


^ 16
2810
34





門 18
2810
卷 4

月齋文集卷五

克齋倫研覽堂

平定張穆

碑銘

誥授振威將軍

太子太保四川提督齊勇毅公神道碑

銘并序

道光二十四年三月十四日四川提督新野齊公以巡練

賢勞卒於馬邊行臺遺疏入

上軫惋蓋臣飾終之典

恩禮有加越一年其孫偉謁選京師旬為家傳上之史館

復以麗牲之文更相諉誣按狀公諱慎字三企年二十以

昭和二十七年
一月十八日
購末

武學生投伍轉戰川楚閒首尾十有二年初拔補倒馬關
經制外委洊升易州營把總大名協左營千總陝安鎮標
右營守備皆遙領未受事嘉慶十年升紫陽營都司始蒞
任十二年升陝安鎮標左營游擊十八年濬滑之役敘功
公爲多

賜號健勇巴圖魯換二品頂戴十九年三月補神木協副
將六月升西安鎮總兵道光元年授甘肅提督八年調直
隸已復調甘肅十七年調四川二十年調雲南冬復調四
川公馭士嚴而有恩汰老羸以羨饒津潤材武更捐祿俸
俟之賞罰必信故隸麾下者雖無事皆瞿然振厲如當大

敵號爲節制之師而公猥介之操尤爲中朝士大夫所敬
仰二十二年正月

命爲叅贊大臣率親兵馳赴廣東獨公以無功不爲軍士
請一錢賞

仁宗睿皇帝嘗褒之曰實心辦事實力練兵

皇上更申獎之曰操守清廉訓練認真以捨渠烏什

詔績像 紫光閣

製贊曰忠誠報國捨剿出力

御筆改題強謙巴圖魯卒年七十

賜謚勇毅揆以行實皆應銘法銘曰

勤矣齊公奮迹南陽以定制突以健搏猶捨必其渠馘必其王橫戈躍馬威名孔揚軍中一時竝名瑜普中忱膠漆惟楊忠武感賊道口忠武杖公公微忠武罔與成功旂車有截逆燄立挫螫弧先拔摧無不破衷甲入關轉戰三才老箐深林昏昕往來忠忘其劬勤忘其恭勇忘其私銳忘其捷餘烈所恢青海涼山裸番而嬰綴鼓而擐借哉晚邁將將非人忠武云亾公力亦單威名孔揚淵淵四部蔽龍厲爪纏頭安堵蠢茲鯨鯢跋浪雷轟壯士吞聲將軍失箸推公蓋抱耿耿南雷摸樁三巖碧火夜灰淬其老謀壓以背鬼謂寇不殄金石其開

墓志銘

誥授光祿大夫河南山東河道總督 贈太子太保渾源栗恭勤公墓志銘

公諱毓美字舍輝別署樸園渾源州人曾祖英祖德本考渥皆贈如公官年十七受知於學使者戈仙舟先生補州學生員食廩餼會稽莫公繼戈任拔充辛酉科選貢實嘉慶五年也七年 朝考二等改知縣分發河南歷署溫孟安陽河內西華諸縣事几案明允所至有績重濬安陽萬金渠民尤利之二十年補甯陵縣河決睢治當頂衝公親履四鄉勘減沙壓地畝額賦請蠲緩課蒔木絲榆棗興築

城郭以工代振民困藉稍蘇旋丁父憂服除仍赴河南卽署淇修武縣事河再決馬營口委勘災因留辦大工總局協放淤工程積勞加升銜道光元年補武陟縣縣負沁面黃隄庫薄不足捍大波公至則加子埏畫增築大隄策已而沁決韓邨公議韓邨之隄激水逆行故數敗若導沁由漫口歸故道改建新隄雖需帑較多而城邑永安酌汰防汛工員數亦適均或徙縣治甯郭驛計尤便大吏以經費有常未允也三年升光州知州四年升汝甯府知府五年調開封剖判敏幹又於其閒興修貢院號舍萬閒經營庀度三載乃究九年升河南糧鹽道調開歸陳許道十年

授湖北按察使定灑獄章程行水保甲江溢辦振定煮粥條規皆可法十二年授河南布政使革屬邑供應浮費於司庫收支總簿外增正稌捐寄四散冊勾稽無隱十四年正月八日兩護巡撫印務奏撤桐柏縣重設查鹽公廠十五年授東河河道總督公久歷河干得諸目驗知失事必在無工處所北岸自武陟至封邱串溝錯出與大河通氣伏秋兩汛巨浸杳然其閒衡家樓馬營工婁漫溢糜財病民阻運所關尤鉅是年七月陽武汛迤上灘水由十七堡南張庵界循舊順隄河直達封邱汛西圈堰前歸河又張庵之北舊有月石土壩本以攬護串溝後因民田

病潦掘斷之架木兩端導水從封邱入河積久分溜亦漸大公慮萬一張庵溝尾下移由壩口逆注則陽武以東隄愈危重因駐節壩前堵合斷流次日大風雨外河內灘盛漲聯絡賴壩口先閉隄根停淤對岸萬家恃以安枕既乃乘小舟由舊順隄河曲折探量勘得陽武支河分溜北駛湍悍幾敵大河兩汎向未儲備稽石無高厓可倚築壩而進水之口日益濶憶前浚賈魯河及武陟城隍見博經泥沙融結堅不可入斧鑿故於開歸道任卽捐俸購博議將代埽及是遂令收買民塼拋壩六十餘道挑溜而南水維頓緩十六年二月復勘得陽武三堡迤下支河又分兩股

乃略仿塞決之法先於原陽越隄築挑水壩從南股抽溝北岸築迎水壩格之口門將合溜忽拋涌當是時咸以爲無可展手足矣公飭急採大柳撥巨艦二倒排口門借舵作椿緯以竹纜繫大柳其上殺溜壘淤然後分路進塼力截北股仍挽歸南復於間段拋築壩朵支河距隄遂皆在七八里外矣先是在布政使任祥符三十二堡串水潰隄料物萃於黑岡公乘傳往視僉曰是非公責且可以無工解不聽命速築柳壩殺其勢或匿笑亦不顧指麾興築至七十餘丈水漸涸上游串溝儘力抵塞決竟復合凡此皆所謂杜患於將萌者也微公漫溢之案且數生公旣灼見

月窟文集五
博壩得力因連疏請以稽料碎石之款酌辦博大指謂以隄束水土功乃其根本築隄宜兼築壩堤猶身壩其四脚也前人用卷埽法竹絡木困博石柳葦同爲治河工料自鑲埽法興始專以稽料爲正則而溜趨靡常鑲埽陡立最易激水之怒溜勢上提埽之上首必須加鑲下坐埽之下首又須接鑲片段日長防守日難稽質鬆弱不三四年卽歸朽爛機宜偶舛輒成口岸夫治河不外以土克水先河臣黎世序用石之始奏稱石爲土之剛者臣謂鍊土爲博博實土之堅者石性滑易於流轉仍不免引溜厥深博性澀與土相膠拋壩卸成坦坡卽能挑遠溜勢況每方博價

六兩石價自六兩至十三兩無定科豫省碎石產自土山形質本脆及采運到工堆砌嵌空查驗不易博隨地皆可燒造尺博一方以千計平鋪高疊舉目可瞭又較量輕重博重嘗培過石三分之一有奇以一方碎石之價可購兩方之博而拋一方之博又可抵兩方碎石之用是用博較之用石省帑更多也或謂博壩與水爭地不知埽工必先築土壩後乃加鑲隸埽朽脫胎壩隨埽蝨有壩名無壩實大溜轉偏隄根博壩則無須埽護卽師築土壩之意而不泥其法臣履任之初卽試行拋築杜新工護舊工五年之間樽節掃費已百五十餘萬兩斯實效也公每有陳奏輒

蒙

嘉允工員大不便旁人亦勗聞此議倡浮言相梗賴

上信公深決其言必可行後卒如所請許之試行之始公終日立泥淖中塼甫出水勢尙動搖卽率先屹立壩頭隨時與廳員營弁講求治策於工之將生未生無不豫謀抵禦然其深意不惟節省經費已也將以埽工所節之費移而培大隄大隄固則漫溢之患可永除宣房萬福所以爲國家計者甚至奈何未竟其施而歿也河標黃運兩營兵專事椿埽城守兵雖習弓馬技藝陳勢亦非所嫻公惟濟甯地界曹兗宵小時竊發操防未可忽因增演三才速

戰諸陳勢捐造銃礮刀矛旗幟鉛丸火藥躬自教練又設義學五所令兵丁子弟讀書其中二十年正月京察

特旨交部議敘二月十七日巡工至鄭州胡家屯夕食感

奇疾眴厥漏加子遽卒年六十有三遺疏入

上震悼咨惜 晉宮銜 賜卹加一等 諭祭葬 予諡

恭勤樞旋豫民繞紉攀號亓千里不絕於是濟甯州奉木主入大王廟及任城書院甯陵縣祀於三賢祠及呂新吾祠公嘗重刻呂子書故也襄城縣祀湯公祠祥符甯陵西華武陟原武陽武安陽諸縣或懼祀名宦建專祠仁賢之實其生被之民而歿令人思也又如此配吳夫人子男二

公卒之日長子烜已由刑部郎中截取知府 記名乃

推恩賜次子耀進士孫男三國華國賢岱齡以二十年

月 日葬 鄉 原公與先君子同受知於會稽莫公

穆又與兩公子相善也謹振敘其政事議論尤大者內之

幽扁銘曰

帝任之博公肩之力財殫牽菱慮沈鍊鑿五載試行厥功

已豐北流不復永式栗公

誥授光祿大夫 太子少保兩廣總督高平祁恭恪公墓

志銘

公諱墳字竹軒一字寄庵系祁氏高平縣孝義里人曾祖

斯滄國學生祖杲工部員外郎考汝裝嘉慶庚申科舉人

中書科中書公年十四補縣學生員時學使者戈仙舟太

僕教士嚴稍扞格輒眾辱之試高平得公卷則大驚謂不

可伍於眾獨揭一榜標異之贈以詩如曲江之遇鄴侯也

嘉慶元年年二十成進士改刑部主事展轉郎官越三十

年至道光四年乃外授河南糧鹽道五年擢浙江按察使

六年擢貴州布政使九年拜刑部右侍郎尋授廣西巡撫

十三年調廣東十八年拜刑部尚書二十年逆夷犯廣州

明年正月大兵會剿公奉

命往辦糧臺事務塗次改授兩廣總督防夷籌海歐血酸

辛又越三年公不還矣公自主事升員外郎郎中皆坐辦
秋審處開館增纂則例爲纂修官每持一議廉平周浹老
於文法者不能奪兩逢京察列上考皆奏留不使去嘉慶
十八年承辦教匪逆案凡數十百起

特旨獎勞賜大緞嘗隨葆齋那公仙舟帥公果亭成公文
文敬公數瀝獄山西直隸湖南廣西諸省道光五年武康
徐蔡氏獄婁經勘治未結正臬司至自引決

上以公代往鞫之遲又久端題開豁得其旁證冤乃雪其
內召爲侍郎也有挾怨燒殺一家數命者司員以誤遺火
種風烈延燒爲詞公不荅徐取日記小冊示之曰某日之

夕星斗燦明無風君爲囚地獨不爲一家數命地邪卒擬
抵其不爲世俗之仁又如此公爲人循循姁姁若不敢少
縱而旄節所泣輒能得其邦之魁才賢士以爲己用而比
有功江華猺叛蒼梧猺應之由大貴山龍井村出道石墟
謀奔江華公旣豫調軍將塞與長塘接壤之姑漣桂嶺諸
山口用舉人陸錫璞吳元德策先撫其猺之良者授同知
易中孚兵俾便宜行事中孚聞叛猺已出道石窮追及之
於芳林渡相持一晝夜痛剿之禽殺殆盡公用是
晉太子少保銜潮州普甯縣爛匪聚眾肆劫莫敢誰何公
用同知姚柬之策出不意進圍塗洋賊巢立縛其渠正法

禽黨羽四百數十人行旅以安在總督任用學正曾釗策設險師子洋北邊夷船闖入用監生樊封策屯田虎門海墘百六十餘頃逆酋百麥擾三元里民怒磔之公因用訓導黃培芳拔貢余廷槐策檄諭屬縣團練南海番禺順德東莞花縣龍門從化清遠土著民爲七社不費官帑一錢而輸戍虎門諸臺二千人有奇聽調五萬人有奇建倉儲穀十萬石有奇公自通籍後一典廣西學政一充順天鄉試同考官所拔士多通達治體以吏績著稱晚更患難益知惟才爲足恃因上變通考試遴選真才之疏大意欲放唐宋制科爲五日曰博通史鑑曰精熟韜鈴曰製器通算

曰洞知陰陽占候曰熟諳輿圖情形不分文武已未仕及攻舉業與否果屬通才皆許以名上聞詳試錄用其鄉會試第三場亦放此五日略如元人經疑之式設問破格收之議寢不行二十三年冬病劇次年正月得告因埃代未卽行五月二十八日薨年六十有八遺疏入

命照尙書例賜卹諡恭恪

諭祭葬子之銓之鏐皆以本官儘先選用配楊夫人生子五之鈺辛卯科舉人福建沙縣知縣後公八月卒之銓戶部員外郎之鐔國學生殤之鏐候選知州之鏐癸卯科舉人女二適刑部員外郎張楫陝西邠州知州韓鈺孫男九

惇悰愷懌寶書遐齡長齡鳳鳴太平二十六年十月初二
日之銓等將扶公柩葬於祖原之次請銘銘曰

公才精練少而卓然雪沈啓竇定灑若神星輶往來楚粵
晉燕仲山將明

恩意廣宣遂以明刑受

兩朝知拔之郎署置之監司開府粵嶠跨越東西妖巢墮
落絕其桡梯際會多難有枋斧柯側身兩間仰天柰何敵
情叵測民情悅和民情則和公髮日皤匪維髮皤歐血云
多變生何常得才則平公履所交豪雋心傾垂歿一疏彪
彪丹青大星宵竇萬士吞聲我銘公藏言雍其織龍騫螭

屈

賜碑共瞻泣水洞洞縣壺巉巉鐫詞邃室證史何慙

誥贈奉政大夫左春坊左贊善候補東河縣丞外舅趙君
墓志銘

君諱學彭字子述武進趙恭毅公五世孫也恭毅長子侍
講公熊詔生兩浙江南都轉鹽運使侗敦都轉生刑部郎
中繩男刑部公二子長懷玉世稱味辛先生次球玉以孫
振祚官贈儒林郎翰林院編修君之考也穆爲趙氏婿距
君歿垂二十年未獲一親言論然時時以君素行諮於所
識武陽之人皆君之舊游至戚也安邑知縣劉君承寬曰

先禮部少治春秋爲胡毋氏之學人罕達者君一見獨通
知科旨會學使者案臨卽抒其義於應試之文學使者奇
賞之拔置第一補縣學生先禮部爲諸生貧甚館穀所入
率舉以付君君爲營置生產家賴以小康先禮部題君遺
照曰吾家待子行謂此也宗人府丞吳公孝銘日子述內
行修飭而意涉恢奇年未三十秋試輒偃蹇失期旅橐常
不充及走探之乃見其盛召賓客爲歡讌若重有所規畫
者時以吏事自急救迄亦未得一展也開封知府董君基
誠日子述嘗爲我言其志趣而深有意乎馬伏波之爲人
與人交氣誼諄固急貨糞數百金未嘗索署券曰無令後

人破我交情人以此號君爲俠陝西山陽知縣周君儀暉
曰嘉慶末年君以縣丞籤發東河蘭陽之役姚亮甫中丞
夜出視工員勤惰見君頓且寒慰之曰才不可恃此爲腥
羹地有才者尤當慎君對曰學彭先恭毅裔職雖卑家法
不敢踰中丞解衣衣之曰李制軍世傑卽由丞倅起家君
勉之矣因以屬周觀察以輝觀察延君幕中賓主雅相得
及君遭疾疫歿觀察哭之慟以百金購良材斂之且飭屬
廳厚飲之需次一年而獲上信友如此非有實行動人不
能也穆旣習聞諸君言已讀味辛先生亦有生齋集題君
遺照及祭文其言有足與諸君相補者略日子述爲先刑

部府君鍾愛又爲吾弟家督賴堵門戶其容豐其性醇才
又能肆應於理皆宜得壽又曰諸姪之中汝性尤慧年裁
舞勺已通諸經旣冠余服官京師汝代吾之職深得大父
歡心先意承志服勞罔倦戚黨嘖嘖不閒人言嗚呼宗族
稱孝鄉黨稱弟君可謂不媿士行矣卒以道光元年七月
初四日年四十三配劉氏 誥封太宜人文定公女孫申
受先生之妹安邑令承寬姑母也道光二十七年二月十
九日卒年七十一子男二振祚乙未進士左春坊左贊善
振禔嗣弟學傅後女子四人長字刑部主事青陽王元林
未昏守貞次適平定張穆次適工部員外郎太谷賈世行

次適同邑巢廷翰孫男二人忱恕振祚卜葬得吉壤屬穆
爲製銘銘曰

聖清名臣恭毅首出循聲清德世載勿失君才騰異又遭
良時鬱有其抱未窆厥施蘭陽小試疾來如風有子繼起
經術愷深君抱其攄九京破涕我銘不私用式奕世

揀選知縣李君墓志銘

君諱曰茂字子才改字子勉別署怡山李氏爲平定巨戴
金元來代有著人自君曾大父始徙居州西十五里之大
陽泉鄉鄉人耕作冶染爲業不省讀書何事已而先泗州
府君致政卜築鄉之白氏山莊先君子繼起有聲鄉人始

漸覺讀書足慕而君之先德亦於是時稍稍以研桑阜其家而教子以讀書鄉塾冬烘課授猥屑君顧能自振拔不假熏沐早以文筆有譽人口有白先生績五者闡學工醫與先君子雅善見君所業賞異之陰用相質先君子咨歎曰後進中未見其比也君因是與穆諸兄交契爲文負聲薦藻典而不靡癸酉丙子間角藝者魁杓所指無不以君爲稱首乃連躋文場丁大艱齒髮加壯翻然曰柰何以帖括自封則取孔賈正義及近儒經說窮際端委手自纂晉天文輿地樂算禮綱一一通貫久之經術之華爛然充實而文體亦因以益醇鄉居寡合所朝夕見者愚兄弟數人

外惟白先生之子鈍之交最久而密山莊當谷口差饒竹木池臺之勝故尤無日不相尋於柏堂梧墅間穆年十九奉母旋里無可攷鏡輒以文謁君君爲開判疑滯刮摩潤色不因其椎魯所遠也比服除同試於學使者君率占高等與愚兄弟屨屐後先如是者又幾及十年至道光乙未乃獲舉於鄉而君年則四十有九矣申戊子丑四試禮闈不第甲辰春入都感末疾未與試歸兩越月遂不起六月初六日也初娶張氏無出再娶趙氏子男二惺吉恆吉女二嫁牛芝田劉鳳山孫男二家楣家彥以其年十一月初九日葬桃水南先塋之次先期惺吉以書來請銘銘曰

剛者易訖君守則柔華者不實君葆其質在昔城南運南
張君稱君淳懿古之善人玉美不彫金段益純善氣所開
媿媿恂恂胡不銀艾終老鄉關胡不壽耆中路摧殘惟君
於蒙誼兼師友泉扃永鍵銘絜不朽

傳

高要蘇封君家傳

道光二十三年春有白氣自天西南隅絕九州殊域直埽
參旗經五六十日不滅於是御史高要蘇君賡堂抗疏數
千言大旨以時政乖迂歸過宰輔而勸
上敕命善任使下罪已之詔開直諫之門語切至多所指

斥

上覽奏動容

特旨嘉獎當是時蘇御史直聲聞天下先是賡堂由編修
轉御史念封君熙亭先生年且七十久曠省侍將假歸養
封君馳書止之曰吾許汝仕卽不私汝身汝以翰林歸可
今爲言官未有一言補於時輕去負 國非吾望也穆忝
與賡堂以道義相琢磨封君手蹟嘗親見之當海壘事起
賡堂既多所敷陳已乃綜二十餘年時事得失旁魄而論
之感天譴寤

主心其言皆它人所難言惟封君實佑啓之未幾封君卒

於里賡堂以憂歸服既闋緘所自爲墓志屬穆爲文附家
乘後案志君諱燦舉字耀揚號熙亭少孤育於世父世父
老而貧任力以養敬禮無缺訓子嚴言規行矩不少寬假
惟聞請買書則喜交遊有賢俊則加喜家中匱猶質田以
資游學自奉刻苦不廢施予昏喪貸負率歸其券佃戶溫
甲匿穀願隸子於家償逋租食而遣之不疑道光十三年
秋縣境被水賡堂方罷第歸命粥裒倡振以澹族人蘇氏
始遷祖宋教授某有祀田久蕩失力興復之手錄教授以
下世次行事爲家謀未成遺命賡堂踵成之不惑風水禍
福誠卜兆望祖塋勿徇葬師營遠地賡堂兄弟率教惟謹

以二十四年十二月葬於丹陵坊後鳳背茆去其考墓迤
東百八十步地爲蘇族以裔霖孫數十家公產感封君德
讓以葬也配李恭人生廷魁賡堂其字乙未進士刑科給
事中繼娶羅恭人生廷鈞候選訓導君以廷魁官封贈如
其階卒年七十有二
論曰封君沮子歸省且責之言夫言之讎與否不可逆計
也愛其子俾之學欲爲名臣有所樹立不饜竊于時也當
賡堂上封事時頗有以親老禍叵測懼之者不知賡堂正
以此成其親志伏青蒲飛白簡不爲親戚所譙訶可多得
哉可多得哉

誥授振威將軍 太子太保齊勇毅公家傳

公系齊氏諱慎字禮堂曾祖世有祖琦父清柱世籍南陽新野縣公幼魁碩父奇其貌教以挽強據鞍十九歲入邑庠爲武學生乾隆五十八年也於時川楚教匪起連陷郡縣蠶午蠹爛不恆而襄陽賊且合隊攻樊城蔓延鄧州新野間鄉里震恐大府攻撲不暇下教所屬責之團練父於是昇公裘一馬一諭曰能爲 國殺賊立功名吾願慰矣嘉慶元年公遂率練勇入伍隸慶將軍成慶下嘗追剿逆匪於襄陽縣之葉家店鎮安縣之大中溪甯羌州之馬黃溝廣元縣之流沙坡略陽縣之曹家山竹溪縣之雞骨梁

襄陽府之灣門岡平利縣之平溪河首尾十二年由楚而陝而蜀而復楚枕戈蓐馬不啻百戰所到必生擒其渠斬馘不可勝計而淬厲其氣亦遂以勇名聞天下被先帝知一時自楊忠武公外無其倫也經略額侯薦其材武每簿上功輒奏

予升階比三省教匪平已洊官游擊開府陝安鎮戴孔雀翎屹然負海內望矣忠武公與公雅契十八年濬滑之變首檄公赴援十月師抵新鄭遇賊道口河忠武公揮兵直前感之公繼進賊氣奪退入巢次日公獨要賊衛河西岸蹂之賊掠中市所率騎截其歸路賊渡河將南竄復由衛

河驅至道口東與官兵夾擊之毀浮橋扼賊西突遂奪道口巢敗桃園援賊兵進次滑駐營未定城西北門出賊萬餘來劫激兵再戰相持竟夜遲明城內復出賊二千與外合躍馬橫衝之陣中斷乃大奔潰已而遇賊陽武縣之延州集有賊目乘車來手發一銃斃之餘眾譁而北賊入新鄉戰牛市立摧破之首逆李文成劉國明屯司寨爲負隅勢建策由淇縣大廟山右入直下擣之塵戰白土岡仰攻司寨盲矢石毀其寨垣縱火焚碣樓無得脫者計自道口接仗至此大小十有三戰凡手縛著名賊目七十餘人生擒二千餘人斬首五六十級救出被脇難民萬有餘口奪

獲旌幟軍械牛馬無算敘功最諸將

恩加健勇巴圖魯號疊

賜佩飾銀幣十二月進圍滑城擊殺百餘人擒九人首逆黃興宰在焉城轟陷手幟先登自日出比日昃生擒又二千餘人擊殺無算滑縣平奉

旨先換二品頂戴以副將升用岐山三才破股匪作亂擾及寶雞隴州復偕忠武入關十九年正月由墊屋郿縣進兵及賊於伯陽嶺苦戰一晝夜殲首從四千餘人進追至二十四壩都督河更迭大創之關隴肅清奏補神木協副將

晉授西安鎮總兵二十三年調陝安道光元年
擢甘肅提督二年二月西甯插帳番擾河北公率本標兵
出扁都口由庫庫諾爾西北進至葉瑪圖一戰於烏蘭哈
達再戰於哈錫格山梁再戰於落它灘生擒三十六人擊
殺二百餘人餘賊向克克烏蘇遁大軍抵雪山口番眾率
老弱乞免死放還河南誓不敢復渡北岸遂班師

上嘉其戴事神速

獎賜佩飾交部從優議敘三年正月

恩賚長矛二高麗刀二厄魯特烏銃自來火烏銃雙筒烏
銃各一仍褒其平番勞績云六年秋喀什噶爾不靖長文

襄公調公赴阿克蘇總理營務充翼長行抵庫車聞父喪
文襄爲請假七日成服俟軍務竣補行守制奉

上諭齊愼急公圖效著傳旨嘉獎加恩賞銀二百兩由河
南藩庫提取交該提督家中爲治喪費十一月派防禦烏
什喀倫有奇里克部布魯特助逆抄掠公蹤蹟得之於松
樹林佳噶賴阿勒坦克烏玉布拉克諸要隘戰屢捷生擒
三百餘人擊殺九百餘人并手縛其比庫圖魯克張格爾
所倚以擾烏什者也七年六月移駐哈蘭圭喀倫外之倭
胡素魯遏賊內犯有自回部逃歸者言回人讐公威名與
忠武公等忠武公美髯同人稱曰哈薩諸班而稱公爲蔽

龍諸班齧龍華言虎也回部平遵

旨回籍守制八年九月假滿入

覲改授古北口提督續像 紫光閣

御筆更題強謙巴圖魯號

贊曰新野武庠滑縣擊賊提督兩省忠誠報國烏什防邊
擒剿出力大頭目誰庫圖魯克十二年二月散疾作奏請
開缺調理奉

上諭齊慎前在楚省軍營兩受矛傷滑縣首先登城石傷
尤重實爲奮勇出力在直隸提督任內整飭營伍訓練操
防俱臻妥協茲因傷濕復發一時未能就痊著允所請準

其開缺回籍安心調理一俟病痊卽來京另賞差使歸未
暮河南巡撫奉 廷寄委員慰問十三年四月在籍拜甘
肅提督之

命十七年調任四川因舊疾復發請假奉

上諭四川提督統轄全省營務最關緊要齊慎操守清廉
訓練認真朕所深知是以調補著毋庸限以假期卽於途
次安心調理準其緩程赴任以示體恤秋抵蜀雷波夷蠢
動力疾提軍前進入大小涼山攀箐路短刀索戰寸步
之外懸厓刺天忘疾之在身也凡搜擒夷匪將二千計十
二月撤師出山得

旨優敘十八年調任雲南冬復調四川二十年暎夷犯順
虎門失守公奏請赴剿奉

硃批忠勇可嘉二十一年二月

上既授奕山靖逆將軍則

命公爲參贊大臣馳赴廣東公至無可措手者率所領川
兵五百駐扎省西北六十里之佛山鎮防禦奸匪撫夷之
議獨不會銜十二月崇陽民變奉

命仍作爲參贊大臣馳往剿辦中途聞崇陽亂平回本任
未幾復奉

命赴浙江會同揚威將軍辦賊公駐軍甯波城北三城未

復而逆夷破乍浦犯松江陷寶山陳忠愍公死之夷艘入
江公不勝忿懣請率所部兵過行赴援奉

硃批如此奮勇必能仰邀天神佑助六月抵鎮江則軍資
器械無所取給而鎮道大員昌言避寇疏劾之逆夷旣得
鎮江不守以二三大船塞南北江口領大隊赴江甯要索
金錢馬頭務滿欲公無可如何激厲親兵夜驀入鎮江城
殺其留守夷人夷疑且畏不敢復居城內事竣仍回本任
二十四年三月初十日卒於馬邊行臺年七十遺疏入奉
上諭四川提督齊慎服官四十餘年歷次軍務無不在事
馳驅戰功卓著自簡任四川提督以來訓練操防尤屬認

真方資倚畀遠爾溢逝殊堪軫惜著施恩賞加太子太保
銜照提督例賜卹任內一切處分悉予開復伊孫候選知
縣齊偉於服滿後送部引見所有應得卹典該衙門察例
具奏旋蒙

諭祭葬

賜諡勇毅子重義戶部主事孫偉僭健

論曰近五十年名將皆崛起於三省教匪之會汾陽西平
功成身泰如楊忠武尙矣餘頗有以智術才略博五等賞
者而晚節不終爲世僂笑殆天奪其鑿耶獨公氣沈志定
不難不悚南雷之節炳于丹青然或百戰而不挫其鋒或

束手而無所用其武抑遭會有幸有不幸也忠武請老
上從容問異日如有軍務武臣中誰可繼卿者忠武奏齊
慎材任將帥嗚呼英夷之變使忠武尙在行間公之功名
不且與川楚濬滑等烈哉

行述

例授奉政大夫翰林院編修 記名御史顯考曉泝府君
暨顯妣王宜人李宜人行述

府君諱敦頤字復之號曉泝姓張氏先大父季子也府君
乾隆三十七年生於合肥縣署大父授以孝經爾雅并爲
講解故訓大義輒能領會七歲隨大母陳太宜人自壽州

歸行輿中不廢讀書歸里受業於州學博竇亭年先生泐
先生固大父弟子也府君穎悟絕人先生作天馬說贈之
所以獎許之者甚至年十四應童子試默十三經學使戴
文端多方難之府君矢口孰誦如流水并屢折文端之誤
文端因是不懌謂學官曰此遠到才不可令其速化待吾
科試更覆試之旋丁嫡祖母杜恭人憂五十五年服闋茹
古香尚書得府君卷訝其經義紛綸曰必老宿也首拔之
及覆試訝文與年不相副面試之文才半尚書掣視歎曰
古文作手也先是大父自泗州請養歸府君遂承庭訓見
聞日擴及是研讀益劬鍵戶夜誦恆至達旦積勞咯血醫

家以爲難治府君泣曰吾死吾父母將何以爲情養疴獅
子山繙方書得導引訣日夕靜坐調息期年疾盡除五十
八年丁大父憂自大父之以終養歸也府君復受學於大
父者八年及是遂奉大母命入京師執贄於程蘭翹曹顧
崖先生二先生皆大父江南所得士而府君之從顧崖先
生游者爲最久嗣顧崖先生督學山左約府君同行閱卷
所刻試牘率府君筆也府君數載游學每臘必歸省春出
冬返歲以爲常嘉慶二年歲試高等食廩餼五年學使莫
寶齋先生選拔茂才異等令讀書晉陽書院甫半載七冠
其曹嘗署其文尾曰三晉多才對此皆當頰首秋捷於鄉

寶齋先生攜入都館於其家七年罷禮部試歸丁大母憂
大母之疾也以患氣瘕府君扶持抑搔目不交睫者數月
比歿哀毀骨立祭葬盡禮無不及情亦不敢過情也八年
汾西令重慶鄒君樹賡延課其子十年會試歸金公應琦
巡撫山右蒞任過州邀府君至署課其幼孫并諮以地方
利病平定在晉省東界例食解鹽顧地寫遠向就食長蘆
以非公也屢爲關胥所梗府君請於中丞曰吾來時州民
淡食久矣今一郡之民僉曰長蘆便而顧強遏其欲必令
衝露霧犯艱險膠循舊例其斃人情也實甚公爲 國家
宣化苟有不便得以上聞盍少貸之以舒民命中丞於是

通檄直隸揭示關門令無阻過州人至今便之初府君受
中丞聘以憚煩辭中丞固強而後可至是益厭其擾十一
年太平令顧公玉書延主太平書院府君忻然諾之至嚴
立課程諸生居院中者質疑辨難昕夕不倦每升講諸生
立堂下面剖其優劣人以是益發憤次科獲雋者六人十
六年成進士 殿試二甲十六名

欽點翰林院庶吉士甲戌散館一等

授職編修二十年充治河方畧館纂修所纂治河方畧一
書原稿條目頗舛府君殫心鉤考秩然劃然旋充 武英
殿纂修二十一年秋充直省鄉試磨勘官二十二年充

殿試收掌官七月保送御史引

見記名二十三年二月大考二等五月初十日

欽命福建正考官副之者中書舍人陳君詩府君有紀

恩詩三章云傳來

天語詔書榮閩越星軺督使程鉅省人文衡不易中材委

任職非輕幾番楮費三年刻四十丹還九轉成自注余鄉會九試

切莫恃才輕閱過倍加詳慎荅

皇誠出都車馬轉庚郵

聖主恩深未易酬幸有頭銜能却暑敢誇眼纈似激秋金

鍼度本青箱續自注先君庚寅分校江南珊瑚網疏防赤水投但得有才

歸實用此行庶不負虛求閩洛文章理學全羣英輩出仰

前賢心香一瓣人爭奉衣鉢兩家吾愧傳自注莫寶齋何紹甫兩師先是

俱典試閩中筆有奇光騰劍壁胸無成見忘魚筌最防銅臭鑽

營巧關節深宜鎖鑰堅途次奉酬舍人詩有曰所願異時

公校閱菲才慎莫損聲名行抵杭州忽感受暑風未甚也

七月十一日至嚴州府建德縣屬之大洋早辰猶送客出

船外西刻痰涎上壅竟致不起時吾州張君去非先大父

弟子也適宰是邑實親視含斂云府君天性和易終身無

疾言遽色事大父母克盡其孝身嘗佩小冊凡大父母命

無小大悉書之後每檢閱猶零涕不置處兄弟無爾我分

與人交事事處下晚年尤究心於理學几上置黑白豆分
記念之善惡如趙叔平事夏月戒家人勿以熱湯傾地恐
傷物命烈風雷雨雖中夜必披衣起坐遇貧乏解推無吝
意嘗自都中歸見清水河邊有露殮未掩爲質物市棺以
葬府君生平行事大率類此距生於乾隆三十七年十一
月二十八日子時享壽四十有七不孝等匍匐扶柩歸以
嘉慶二十四年九月二十六日暨顯妣王宜人安葬於洞
嶺祖塋之次

原配顯妣王宜人康熙癸巳進士陝西榆葭道諱凝孫先
外祖繩祖公女十四歲歸府君大母愛之如女大母中年

持佛不茹葷酒吾母潔治素饌廿餘年無少懈及病侍湯
藥動息扶將晝夜未嘗去側大母彌留時持母手而泣曰
願他日有子婦如汝夫婦之事予自大母歿府君家居日
鮮吾母屏當家政中間屢治婚喪無不井井姻家誕育事
禮數必周每質衣珥爲問遣費以是府君無內顧憂甲子
大伯母攜兩兄從先伯於江右而以姊嫂及姪遺吾母母
撫育教誨如己子女蓋七年猶一日也癸酉冬先二伯患
傷寒不孝開暹亦染是疾甫愈尙未彌月忽中夜伯病危
吾母促令人城備衣衾曰汝兄等昏迷無所措矣將諉之
誰哉後料理喪葬又吾母實左右之母性儉約而篤於周

急甲戌冬之京師風雪中有老嫗率子女行母見之惻然
卽舉舉中衣物賜之或葬娶無資輒脫簪釧以助卹中夫
婦沾惠者至今猶稱善人難再得也持家久積勞得心疾
時發時止乙亥在京寓疾又作醫藥罔效至七月初五日
竟舍家人而逝秋府君命扶柩歸停於內寢方謀葬事而
府君又見背矣嗚呼痛哉吾母生於乾隆三十八年十一
月初五日辰時享壽四十有三生子四長不孝開暹國學
生取歲貢生李公名萬女次不孝晉暹廩膳生娶州庠生
黃公士鵬女次不孝麗暹州庠生娶戊戌進士詹事府左
春坊左庶子祁公韵士女次不孝瀛暹廩膳生娶候銓訓

導劉公濤女女二長適壬子解元廣西藤縣知縣任公質
淳子庠生名模靖次適候補知府原貴州鎮甯州知州楊
公文楷子詹事府主簿名煦孫男四長孝芬開暹出次孝
祈晉暹出次孝救孝瞻麗暹出俱幼未聘孫女六開暹出
者三晉暹出者二麗暹出者一俱幼未字

繼配顯妣李宜人浙之山陰人外祖諱廷良寶齋先生舅
氏也母幼端靜外祖父母甚鍾愛之年十八隨寶齋先生
眷北發至京師歸府君時先母已棄養三年矣不孝等垢
裾敗絮壅塞盈笥吾母初至卽爲澣濯縫紉一如先母生
時甫一載遽遭府君凶變吾母聞訃誓欲身徇撫膺呼天

悲動一室既乃忍淚撫不孝瀛暹而言曰汝父去以兒屬我我死兒幼弱其誰屬我其姑俟之由是遂持長齋終身不復肉食寶齋先生時官倉場欲留吾母於家母以瀛讀書故從之遂於是冬攜瀛至其官署瀛就外傅每夕歸吾母坐榻上令執卷旁誦鐙昏漏歇淚熒熒常在目也自後每聞學業有進則喜溢顏色否卽惆悵絜日繼之以泣曰汝父冀汝成立若荒而不學我何以見汝父於地下至今念之猶覺此言之痛也已卯四月旋里治府君葬事次年春寶齋先生復以書來招時楊氏妹年已及笄吾母遂并挈入都不意甫抵都門楊翁已下世矣三年中教養吾妹

恩義並至經營匱具貲血俱枯及嫁日觀者咸歎息動容以爲雖府君在世不過爾也吾母性寡言笑不喜華飾鍼黹外兼通書史諸若佛經閨範嘗手一冊朝夕繙閱值大父母諱辰必親治楮帛曰吾不及事舅姑所能自盡者僅如是耳御臧獲嚴且慈人不敢欺以是非或有疾必給資爲藥餌費在都時嘗有收父骸者告助不孝等入以白母卽傾橐予之數年來育兒嫁女日夜焦籌心力瘁矣壬午八月忽患胃疼庸醫誤以爲痧至冬兼以心驚盜汗終宵發嗽次年春疾益劇一月僅三五日安雖百方求治而日瘦一日矣五月二十八日由京起身將歸爲瀛畢姻路中

精神較常似健至六月初八日抵家次早出戶坐簷下尙能弄小孫戲二十日曉興與家人話聲殊清朗是日凡四飯不孝等私心竊喜孰意至晚腹洩大作胃疼更烈竟於次日午後溘然而逝邪時道光三年六月二十一日申時距生於嘉慶三年正月二十九日子時享壽僅二十有四不孝等卽於是年十二月二十一日扶柩合葬焉始乙亥吾母歿不孝等依父如母及父歿依母如依父也所冀兄弟四人倘有寸進或可稍慰母心今并不獲終事吾母矣嗚呼一世孀居六年育子婚嫁甫畢音容遽杳豈吾母至是仍不忘身徇之誓邪不孝等罪孽深重不十年間疊遭

大變天之降割胡至此極嗚呼痛哉

涇縣潘錫恩填諱

先兄補庵府君行述

兄諱晉暹字仲明別署補庵先大夫之次子也方在娠母王宜人夢有菡萏發池中俄而苞俄而華迎風忽墮寤而兄生膚黑聲宏大母良愛之曰此非常兒也年十三竊引筆作擘窠書頓挫獨出爲文章擴雅訓瞬息千言同學者方彭亨構思兄已滌筆酣臥矣歲辛未先大夫成進士下榻庶常館兄趨庭問字學日進同館丈人偶拈枯棘題試之兄伸紙疾書巧思濬發不爲所窘也甲戌春歸里未及院試奉母北上逾年母遘心疾兄入則調護湯藥出則

血疏顙天而鮮民無祿慈帷終揜當斯時瀛暹甫十歲父固以父而兼師兄實以兄而代母晨而興也兄衣裳之夕而寐也兄撫摩之餐其飢爲市美餌閱其垢爲易新服以是失恃三年不知無母之苦也及吾母李宜人來歸三兄將授室兄攜以旋兼應郡試州刺史念庭吳君拔置第一因受知於賀耦庚學使補博士弟子時戊寅之六月先大夫奉

命主試福建塗出巖州感暑風奄捐館舍兄聞訃偕伯兄爾足星奔舁柩返葬李宜人亦自京師攜瀛暹歸視葬事葬既數復同奉板輿入都依莫寶齋表舅於潞河督署維

時舅方以性命之指提呼後進而吾師吳樸庵先生實館其家兄旣得聞兩先生之說退而歎曰向之汲汲於詞章役役於利祿世所詫爲榮懷愜意之事適足汨吾性眞耳舍此不學虛度一生矣於是拏精覃思心維口誦蓋實有窺於大道之微躬行實踐著其效於家庭而非講學家標榜門戶者比也歸語同志亦稍稍有信之者而兄之指授後生則一以朱子小學爲階梯故州人士之知誦小學自兄始癸未復丁李宜人憂服闋學使案臨兄以高等補增廣生瀛暹入郡庠戊子科試瀛暹忝列第一而兄第三同時食廩餼三兄亦入郡庠一門之中蒸蒸日上起色矣兄獨

嗷然不樂謂瀛遲曰吾兄弟十年之內三擢重戚今雖死
灰有復然之機會不得奉觴上壽壹笑相樂可痛孰甚且
卽以科第論先大夫鞅掌王事齋志以歿所有待於後人
者尤非區區一衿遂克仰訓先志言訖泫然瀛遲謹志之
不敢忘獨媿駑駘之骨鞭策不前今兄歿又七年矣不惟
無以慰吾父抑并無以慰吾兄也尙何言哉尙何言哉瀛
遲家世寒素鮮封殖洎疊遭大變產益落而食指之繁則
視昔有加兄推燥就溼左支右詘朝饗而謀其午夏暑而
軫其寒用此爲常不以關兄弟慮也每昧爽家人臥未起
兄振衣出戶擘畫米鹽必專一日之需退乃讀書方兄之

生也見其鯁鯁細務未始不竊議其瑣及兄歿而躬操其
勞不終日頽然憊矣今則婦子日以睽離生計日以淪替
廢者未及舉而舉者輒復廢死如有知能不重以此爲弟
輩罪哉兄體氣豐碩堅忍耐勞疑非寒暑所能侵者而兄
每自傷其脆歲庚寅瀛遲以疴羸善病養疴天門山之玉
皇觀兄不時來來輒爲經紀其衣食六月初尙一至山齋
留信宿乃去及初八日之夕扇四下矣猝有呼於觀下者
驚起訊之則報兄以中風胸仆環救未蘇奔歸入視見兄
合目僵臥左手足已成瘻痺脈之或曰熱厥也或曰陰虛
傷風而經絕也病榻憧憧迄無定見瀛遲祝而簪之遇乾

之同人其誦曰同人先號咷而後笑大師克相遇奉兆噉
然失聲知兄之將不起也嗚呼天何奪吾兄筭之速至此
亟邪兄善行楷自孩幼弄筆已驚其長老稍長摹續松雪
惟妙惟肖既以鄙其爲人痛自盪滌登善清臣兩家外不
屑規放也尤熹寫書自本經以及諸子文集鈔撮等身而
蠅頭細字一筆不苟瀛暹謹甄諸篋衍將待孝祈之壯而
授之嘗客黎城得利氏同文之術於中西算法雅有契悟
惜乎洞淵松庭之奧瀛暹今始得聞未及與兄切究之也
兄生於乾隆五十九年四月十六日卒於道光十年六月
十二日春秋三十有七娶黃氏郡文學諱士鵬女子一孝

祈聘乙酉科副貢董君調女女二長未字次字浙江建德
縣知縣張去非先生之孫名岑之子于臯今卜以道光十
七年十一月二十八日葬兄洞嶺先塋之次瀛暹旣勾諸
兄之契友李君怡山鐫銘於幽復攄掇梗概述爲此文以
志吾痛且以詒其子孫

Blank page with vertical lines for text.

肩齋文集卷六

平定張穆

祭文

亭林先生祠落成公祭文

先生生當叔季業貫漢唐學堪為王者師志非以名山老
身甘荒遐慰九原忠孝之心時際雲雷灑六謁園陵之淚
北征初賦策二馬以來游東道既通餽十饗而恐後咨民
生之利病邑乘必搜究阨塞之險夷邊亭親歷采山鍊冶
喻半生尚論之精勤訂韻諧聲發萬古同文之要眇況乎
志存淑世婁構書堂雅慕伏波厲精田牧皋比不擁懲東

林復社之末流墨突未黔棄濂涇桑莊如敝屣惟慈仁之
古寺曾作寓公計偉節之遄行適在明日誦孔德炊羹之
句下榻何頻緬無異築室之謀顧廬宛在荆榛乍啟觴豆
初蠲規陋雲臺典同石室所覬雲車風馬胥蟹來臨庶幾
學海儒林精神不朽尚饗

亭林先生生日公祭文

先生行成忠孝學洞古今懲末造之蹈虛進吾徒以考實
凡今代文苑儒林之彥敬佩遺書合天下束脩尚友之懷
思隆美報專祠式啟吉祀祇蠲敢因載誕之辰奉薦迎神
之曲雖薊門卻饋痛援往例於靈均而石室修儀展效拜

經於榮緒尙其陟降鑒此悃忱尚饗

公祭栗恭勤公文

於戲北岳之雲飛來於嵩液而爲霖霖雨所被自大河滸
及荆山陰赤子扶扶依公如父不瘖不喑公潤澤願公
壽考涕感蒼黔胡天不憇醫巫旁皇莫效譟箴遺章入奏
帝用震悼捧淚沾衿馳赴天下中外皇然歎劇嘯暗繫公
弱冠起家拔萃弦歌矢音飛黃奮足萬馬失氣雲路駸駸
不牽羈勒遂許驅馳咫尺而驂土戀桐鄉聲流軹井沙海
棠甘攝邑者八縮篆者再十地惠覃始宦甯陵睢渙瀾狂
魚夢方酣田不成塍廬無遺篋戶版邈尋繼歷武涉丁黃

沁汭險工如林才優槃錯龜手不瘥牛刀厲鐔時乳嗅之
時培護之索縲以熨南陽汝光騶蓋竭來威望森森始是
民驚手刃造隙赤丸恣探挫之摧之冶劍而擾置竿而琴
董興黨校人知詩書廣厦潭潭春鉏秋甯晨壘宵鐙我枱
我蠶斐鼓驚夢潘縣放衙我匡我擇泉領開封洊階觀察
仁愛辜醴矜彼童孺囿於咫尺方眯指南畀之鉛札收之
精舍秀采垂鬢薙其闡棘地拓萬弓屋有周櫛量其歲儲
穀納千倉畏靖民砮陳臬楚北初去豫州遭歲大禘採荒
如火不俟公帑立發私僭飢飢之鬻旅庇之庾寒被之襪
磬磬哀鴻杖公復蘇春風在閭逮綜藩政復還豫州寇君

載臨舊漏新通銷彌不月惟法惟廉鏡茲泮流來自昆侖
原委飽諳撮土成塗束秸成埽糜泉巨浸桃霜汎駛頂溜
蕩滌患釀蹶泔蝻漏婁窳宣房失礎土委黃金公官豫州
垂四十年徧閱河潯舊兵老革溝洫河渠潤古洞今

知人惟哲翊

聖惟忠泰交無嫌迺膺

特簡駐節漁山克單斐忱淬五夜思詒百世利馬刑玉湛
瀕流以陶鍊出計方鱗垣巖巖勸奮其智橫失其巧議不
旁參果斯能斷明斯能周密斯能深越靳文襄及黎襄勤
竝公而三曾不中壽遽歸上霄屯邁巢篤

恩綸聿申重惋勲臣載晉

宮銜飾終典渥

諭祭

諭葬

賚錫孔壬猗與嫩謚式惟我

皇鑒公盡心其事上恭其修官勤仕履可斟長君少成效
績秋官久列朝簪次君白眉早掇乙科

延賞優霑惟公有子嗣聲競爽天道足謀 國枳雲寒鄉

粉月冷哀感曷任清酒既澆靈風颯然涕盼歸歔心光不
泯丹旒童童庶其居歆尚饗

公祭祁恭恪公文

嗚呼人臣有初無赫赫之功可錄而邁會盤錯規制曲善
其用心之密乃更微於折衝保釐之勲乃更高於得雋當
夫海蕩顛波旗飛擘燹島酋肆逆以憑城諸將蒼黃而議
款公於是時而以周室蘇公仰膺

懋簡規五羊之全局坐堂皇而內斷謂藩籬不固則水陸
踵步已紊華夷之限屯練不壯則防禦萬人疇任蒼兕之
選而且守望異情秀頑共服苟非人心鞏碩先示寇以無
瑕又何從用我長而擊彼短然而萋萋驕虜尺咫戶闔愜
愜羸夫習深慮淺其薦紳之明智者雅思保障其鄉瞳而

惰民之愚狡者至乃矜騁其口辯微公定筭默操不疑不
難相機指蹤推懷敦勉烏能於燭釜魚游之地而羨壘言
言鼓申檐卷烏能於鹽海重洋之內而禾莖鱗鱗手輟足
跣又烏能萃五社君子方陳雲合未期年而金城載僦勞
矣哉班定遠建牙萬里竟斷玉關之望痛矣哉馬新息靈
節武溪愁羅壺頭之蹇此故鄉之後進難忘揮涕於老成
而九原之毅魄差可少舒其憤懣者又何況
予祭易名

朝則沛夫飾終之典巷哭里思民劇切夫廟貌之展乎
公祭蘇封翁文

嗚呼世俗之所望於子者率不過甘旨之豐腆與褒贈之
寵榮一旦剽朱奪紫奮蹟省廷誰復責以關心 國是繫
念蒼生惟先生結連嶺之秀家長溪之濱爲善於鄉媿媿
恂恂廣堂蜚英翰苑蔚爲 國賓先生召而誨之曰汝往
服官其毋視世俗人之顯其親凡夫安危利病矜賢矜佞
尋研辨察務上無負於 國而下有裨於民

君恩厚汝我敢私汝之身山筇老健邨酒真醇我行我意
柴車角巾況左右扶進者尙有汝仲之定省於昏晨故當
夷氛不靖羽書填委戰撫異說孰非孰是廣堂抗論擅擅
百折不靡星氣乖常河流溢軌宰衡訐謨曷臧曷否廣堂

指陳得失深維 國枳

天子俞之曰真諫官海內尊之爲名御史神羊威鳳輝連
喜起先生載欣載懼馳戒多端謂論議愈高樹立愈難行
百里者半九十況乃僅託諸空言汝勿自多而謂可少安
勿念我老耄而遽思挂冠古云移孝作忠汝但勉修職事
努力當官又何必朝夕膝下乃爲承歡而乃硯洲之雲嵐
不足供百齡之娛養溪上之艸堂忽驚傳消搖於曳杖龍
蛇占歲鴛鳥在門天下所爭相健羨者以子方之清直端
教晉原而吾黨之失聲痛哭豈不以耆德淪亡良友銜恤
惋弔老成之下更寄感於離羣乎尙饗

祭任太素先生文

於戲人亦有言才欲其豐疊疊先生以才而窮人亦有言
才豐用拙疊疊先生臨事剛決薄有所施未室厥寡終老
於家天平人乎冠雲緜水秀絕陘口先生蔚起雄視山右
乾坤清氣筆端往來抽祕騁妍奧窅洞開少有所作驚其
長老千言灑灑會不屬艸長而博通其學益宏角觝名流
校藝分棚一篇旣出舌橋不下百韻立就氣奪倚馬維時
龍門戴茹及戈失聲爭喟斯何才多風欄呵凍技之餘耳
已令宗匠心折至此元默困敦大啟瓊闈動用縣解單思
詣微相其布墨坦芒文竹疇歟識拔曰魯山木朱弦疏越

厥調何高中旗快避風回海濤區區解首庸足增重所足
詫者衆烏孤鳳大名難再小就所甘牛刀龜手經緯粹醴
未嫻進熟胡試爲吏逢達官怒骨銷積毀嗟嗟爰書幡校
由人有澤漬民有臯漬身叢爾藤邑民甯可罔歸然召戾
于今猶仰仕而見庶猛志未舒空留碑版照耀鄉閭韓韜
歐易九變復貫覃思擗淬天章雲漢始吾王考以古學名
乃實嗣響絕緒復賡抑昔先子訂交總角昏姻締葍文酒
商榷聲名屈屐或後或先死生契闊載拯載援我丁多難
杖之擁樹我拙文詞賴以啟悟風帆初動實引翼之毀室
難完謀奠麗之烈烈血忱輝輝赤膽豈無戚屬靜思增感

猥以肺附觀型於家矩疊規重童穉無譁尊俎觴客肴核
羅列子姓執壺斂漱匿舌坐客未醉子姓敢舖靡之曰去
相率趨隅疊疊先生行足坊世千縑萬軸猶其餘事戊建
春新我嗟南游再拜牀下挽坐堂陬憐我抱疹傷我遇惑
夜闌語絮老淚忽滴竊窺意度兒臞神清命不龔黃年或
錢鏗浩浩海風滔滔江水寒冰塞舟時騰怪鯉先是兩月
液我膠鸞寄命食客涕格闌干惡耗遞來悲曷可止老輩
漸空哀哉小子茫茫天心未喻其深異秉誰畀慘變交尋
康瓠尊閣寶鼎淪蝕磷夫昆玉琛彼燕石綜括古今大綱
攸同得喪窮通應付太空筭踰七十亦足云壽有子克家

必昌厥後感叨知愛敬次韵文悵望龍旒私哭復門塵
先生郡城師表穀率一弛萬端潦倒臨風哀奠喉齒茶尊
安得巫陽更賦招魂尙饗

祭伯兄文

維道光二十七年冬十一月丁丑朔越二十九日乙巳季
弟穆敬以清酌庶羞遙哭奠於顯兄伯居府君之靈日嗚
呼吾兄須眉秀發豐皙不佻朋好相誇每謂似畫中祿星
宜享天福膺大年不意中年以往憂患攪心形容憔悴頓
革舊觀年未六十遂潦倒以終也先大夫年二十而育兄
時大父尙存抱孫甚喜兄之乳字大父所命也稍知讀書

省文義卽以護守先人遺書爲己職片楮隻字珍若金璧
它嗜好不能奪生平工於作楷密行細字篝鐙精繕老猶
不疲聞屬續前一夕尙作蠅頭書至漏四五下一蓺未竟
也去年秋穆輯大父遺事每有疑闕馳書諮商不十餘日
輒檢本書寄京及希音堂集開雕復寄大父小像來俾摹
之集首九月中刻工初竣寄歸樣本意見之必歡喜逾
量一生護守先澤之懷可以稍慰豈知書未得達兄已先
期溘逝耶穆發此書爲十月九日而兄以十一日歿孝翼
來述兄歿狀云父年來食量增健心氣和平往反州城三
十餘里若無事初十日夜邨店坐談三鼓甫歸次日早起

月夜文集卷之二
欹枕坐炕頭喚阿葵爲作午餐一旋踵頃阿葵入視則見
頭微偏口角垂次沾溼裊席不二寸許目瞑不視矣嗚呼
考終爲五福之一大雄氏以無疾示化爲得大解脫兄賦
性忠淑不疑人欺天佑善人宜不以疵癘相加如此而死
抑又何憾獨念門祚衰落吾兄弟四人皆薄有文名皆困
頓場屋見擯於時愈出愈奇或者天不畀我以名猶畀以
壽老年骨肉情話有期乃仲兄最强最先死越十有七年
而兄繼之穆四十有三矣自三十後患咯血甚劇邇來血
稍止而每屆冬令氣輒逆上畏寒畏火噤吃龍鍾似七八
十人以視兩兄之壯碩蓋百不如其又可恃耶先大夫遺

文尙未定有目錄劄牘有待吾兄寫本謹弄篋中諸從子
無能讀祖書者蘭兒甫七歲未敢祝其類我儻穆一旦與
兄同歸不惟婁業青衫斬然中絕卽兄所兢兢護守之遺
書抑復誰知省視珍惜邪穆進取之念久已冰釋惟沒世
之名尙不能無介於懷而所著諸書卒未脫稿按采旣須
時日寫定又無資力傷心之事觸念紛來里社習俗媮薄
兄每有輕去其鄉之意穆則初無此意而以謀食故久客
不歸今兄已矣穆卽歸將何所歸邪歸復誰與共語耶穆
溷迹人海中非無朋友之樂所耿耿在念者獨有兄耳一
舉箸非不飫肥甘也念兄方啖藜藿而止一易衣非不便

輕煖也念兄方擁敗絮而止十餘年來忍寒茹淡之苦衷
兄歿而神明實式鑒之矣穆蓄有百金擬於兄周甲之年
歸而稱觴天不假年遽奪兄筭今卽舉以昇孝翼俾歸治
大事速卽窆嗚呼斂不摩棺瘞不繞墳卽弟一人之身
所以報兄者已遠不及仲兄矣負疚其有終極邪繼嫂聞
尙能持家新婦初來教之和順孝翼知艱苦可望自了穆
一日不死所以給兄家者不敢視兄在有閒也夜雨傷神
山堂在夢嗚呼痛哉尙饗

祭三兄文

維道光二十八年八月壬寅朔日季弟穆謹以清酌庶羞

遙哭奠於三兄叔正府君之靈曰嗚呼穆何辜於天而淡
月之中三遭期親之喪人世慘酷有如是其劇者邪去年
冬聞大兄訃穆與兄書曰吾兄弟四人今已亡其二穆旣
以飢驅不能西歸兄又羈於官守卽吾兩人何日是相見
時耶痛哉豈料其真不復見也及今年二月京師疫氣流
行穆九日之間妻亡子女亦相繼亡十年營葺之巢一旦
迅掃空之人非木石其誰堪此惟念古來賢豪似此遭際
亦尙頗有萬無以身徇之之理此念一定始得黽勉支持
幸而不病豈意兄聞此耗而重爲穆悲且憐且慮轉至於
病也聞四月中偶染時氣已調理就愈及六月轉爲泄瀉

遂以不治而其亡日時刻乃與二兄一一相合骨肉同氣
之慘十九年如一曙嗚呼異矣兄幼頗孱弱吾父母時以
爲憂冠昏以往形氣充實較穆似數倍過之兼以衒衿開
曠瑣屑事略不縈懷皆非不壽之兆何意年未及艾遽從
祖謝邪吾兩人幼同游長同塾兄丰姿玉映讀書敏悟年
十歲已能背諷周官全文不譌一字學大歐書英拔出羣
吾父嘗召穆示之日汝何日能作此書當重賞汝穆勉強
奔赴卒不能及也文詩雖不極意求工而吐詞天秀風調
翩翩充其才卽以取巍科上第亦意中事乃僅僅博一巾
甲辰秋闈主司得兄卷已擬元數日三莖俱登版矣旋因

數語之疵斥不復錄自非家運屯遘天不右吾宗何至兄
弟四人俱顛躓文場至此極與先是捐例開穆在京師承
大兄意竭家貲友力爲兄營一官而得缺無期繼客津門
值海氛不靖

上命大臣赴津防堵兄以隨營效力微勞當道保薦
特旨優敘及銓授平水計歲入可以小康而夙累旣深又
不善籌度出內遂至依然窮窘身後菟裘之計全無料理
賴兄性情和厚與人交不悟故一旦身觀閔凶而太守縣
令所以營護之者能不以存歿異視柩庶遄得歸乎猶憶
己丑歲穆與兄同讀書十柏山房兄病日楚甚中夜嘔穆

起告以所苦穆曰可奈何兄曰無可奈何但告弟知卽分我楚耳時靈州李姑夫縉宿於閣中間之泣下歎曰兄弟疾痛相關乃如此由今念之誠足痛也穆自壬辰北游遂相睽阻惟庚子春兄來京寓相存至七月方歸爲此十年中會合之最久者去臘致兄書雖言相見無期又竊自念三五年間纂輯諸書艸稿粗具將事壯游歷覽名山大川儻尋終南太壹諸勝往來皆涂出平水當抵足聯牀更寫總角之歡豈意凡穆所念到之處天皆斬之而不我畀邪兄年來頗喜讀書於穆所寄書籍皆加校正并爲訪得願譜中王九如閻譜中賈玉萬行實屬事釐訂又時時索異

書以擴見聞穆且喜且尉意從此進業必當有所就又豈意天遽奪兄筭如此其速邪兄身後重賴叔穎先生力爲之部署并遣使歸助扶柩迎春屬歸里穆亦附書媵氏命鼎兒家居奉母銓兒來京寓讀書鼎兒天資稍鈍銓兒幼慧穆所鍾愛而蒙養無基恐聰明亦漸汨沒竭力督教之小成或尙可望兄柩歸後一二年間亦卽安厝日用之計除叔穎幼章兩先生周恤外穆當視大兄二兄家一例接濟嗚呼穆少於兄僅四歲耳木落歸根尙不知作何結局自上月十三日聞訃以來心驚頭眩時時慮有不測夜不成寐起座旁皇蓋不獨爲諸兄悲爲一身懼兼爲祖父以

來書香嗣續危仄也嗚呼痛哉兄靈有知尙其鑒旃

哀詞

靜濤張君哀詞

靜濤諱琴字揮五故浙江建德令張去非先生之子先生二子君居長次岑字小山皆穆二十餘年來柱內扞外所倚賴以生者而靜濤尤有大德於吾家吾子孫當世尸祝之嘉慶二十三年五月先君子典試福建暑雨中傷官程電轉七月初十日舟次建德與去非先生相見握手道故甚懽次日解維去行抵嚴江之大洋疾作遽不起先生固先大父高弟子聞赴趨至哭之慟小斂大斂皆躬親之而

是時奔走給指麾先生左右者獨靜濤一人在先生好酒尙氣誼悼先君子之無祿傷故交淪落宦不得意懷之所鬱性加嚴急抗衾陳衣稍不中節訶怒隨之吾舅氏王丑石先生後每爲穆言靜濤此數日執事之劫寔甚於自營其考妣也倉卒無好棺邑有壽民蓄美櫨歲加髹戚斂之作銅聲靜濤則遣才有口者重訾購得之故先君子雖旅館屬纊無親族子姓視飯舍而附身附棺之事號無遺憾嗚呼太白指南之誼世所容有獨爲亡者之子孫其銜報當何如也去非先生旋解組歸考終里第穆不及見靜濤之事先生及見小山之所以事君者恆感動不能自已小

山長穆八歲歲庚寅同讀書城西天門山君偕一二朋好
時攜酒食過存當是時齒髮皆未彫醴粥尚足支梧而酒
酣漏永歎老嗟卑蓋皆不自意後來之頽唐日甚一日以
至此極也君自言性好弄手目所營無所措其意則不快
然鑒別亦特精似有天授書畫晶玉泉布刀劍裘馬衣服
花竹禽鳥食經茶錄凡可以發舒其聰明者情無不寄也
吾舅氏與君趨向不盡同而好奇嗜古乃雅相契故兩人
者尤終始稱莫逆云所居聽事廣不過三弓深不及兩武
座上客與破門之聲雜沓相聞君各如其品量應之無可
否冰炭在念君既歿小山襍被聽事中破門之聲稍寂矣

穆久違鄉井不獲一哭君與小山挑燈夜話側聞所日相
見者仍惟吾舅氏及吾姊夫立青任君二三人而已立青
性尤狷直居城市人海中落落無合者與君初亦漠然久
而漸習久而意氣融液一如穆之暱君昆仲也然穆以編
急不爲世所容客不歸吾舅氏年逾六十日皇皇於衣食
無讀書子弟資以娛老立青多病善愁小山困於里居無
所展其志氣獨君較是諸人境稍暇適足自給而又以數
舉子不育忽忽不樂疾疾侵尋摧其天年嗚呼傷已君凡
三娶皆育有子女皆早殤最後君已抱痼疾得一子穆爲
命名曰普護及三歲又殤以小山之子臚奎爲嗣先仲兄

補庵之壻立青所自出也小山既頽然無以自遣遭君喪益不自聊道光二十六年走京師造穆曰歲且臘將舉殯事子不可無文以慰我兄於地下也嗚呼君有大德於吾家又重以朋友昏姻之好微小山言詎忘所以傳君而詔我後人者乎爰爲楚聲以寫吾哀釋小山之痛詞曰
昔余厲志以登覽兮君仇爽而善歌指城西之奧岫兮塞禪巖之綠蘿誓宿飽以詣極兮夕憩息乎山阿峯回回而曲轉兮莽不知所扳援叩窈窕之石罅兮訝微光之竅天奮擻身以上躋兮鶴跂猿接而造顛初睥眄而失恃兮旋抵掌而大笑席錦石而酌瓠尊兮振林谷而歸歛欵豪情

之消阻兮皇天曾不許以申眉余旣莫知所稅駕兮君齋痛於無見窺日月之蔽虧兮深林方晝而杳冥江介紛其苦雨兮北萌祓魅使不靈余終莫知所稅駕兮君怡神於幽扃馨嗣孤之麥飯兮沁仲氏之老淚感石交之日稀兮誰復喻吾之遠志也

